



Comme Saint Iean vid les ames de ceux qui estoient morts pour la parole de Dieu, demander vengeance.

VAND le cinquième seau fut ouuert, S. Iean vid sous l'Autel les ames de ceux qui auoient esté tuez par la parole de Dieu, & pour le témoignage qu'ils rendoient de la verité d'icelle; elles crioient à haute voix, disans, Iusques à quand, Seigneur saint & veritable, ne iuges-tu point & ne venges-tu nostre sang sur ceux qui habitent en la terre? Et leur furent données à chacune des robes blanches, & leur fut dit qu'elles eussent encores patience, & qu'elles se reposassent vn peu de temps iusques à ce que le nombre de leurs compagnons seruiteurs de Dieu fust accompli, & de leurs freres, qui deuoient aussi estre mis à mort comme ils auoient esté. De laquelle vision on peut conjecturer, que la consommation du monde aduiendra lors que le nombre des Martyrs & Fideles, sera entierement remply, lequel nombre est conneu de Dieu seul; & partant incertain aux hommes quand ce temps-là aduiendra, s'il n'est particulièrement reuelé de Dieu.